

مجله دانش

س ۱ ۳۰ ۳ ۱ ۳ ۱

والله يهدي من يشاء الى صراط مستقيم ديني . علمي ، ادبي ، سياسي هفته‌لق مجموعه اسلاميه در
اتبعون اهدكم سبيل الرشاد

صاحب دمير مسئول : ح . اشرف اديب

افاضة انواری عینی . ایشته بن بو حقیقت واضحی - الحمد لله ! -
اکلادم . مهر توحیدی کمال تعظیم ایله سلاملادم .

بزی شمده یه قدر یاشاتان و بوندن صوکر ایاشاتاجق اولان بو
کونشدر . مهر توحیددن یوز چویرن و یاراسالر کبی قارالقلره قاچان
هرهانکی بر قومک وای حاله !

قوردلر اطرافزی آلمش ، دیشلرینی غیجیرداتیورلر . سورودن
آریلان قویونلر اجلارینه قوشیور . قوردلره ، جانوارلره لقمه اولغه
کیدیور .

اگر حقیقة مؤمن ایسهک ، بودعوا من کرچک ایسه اتحاد
ایدهلم . اتحادک دلیلی حقیقی اخوت ، صمیمی محبت ، یکدیگریمزه
فداکارانه معاونتدر . ایشته اتحادک وجودینی اثبات ایدهک بونلردر .
یوقسه قوری لاف پاره ایتمز . معناسر سوزک هیچ برحکمی ، هیچ
برتأثیری یوقدر . (اتمک) دیمکه قارن دویماز . اورتهده (اتمک) ک
وجودی لازم . خلاصه :

توحید ، اتحاد ایله قائم

اتحاد ، توحید ایله دائم

اللهم اهدنا صراطک المستقیم .

محمد فخرالدین

طرابلس غرب محاربه سی - اوروپا

انتباه عالم اسلام

ایتالیا حکومت باغیه سنک طرابلس غرب خاک پاک اسلامی و عثمانی یه
وقوعبولان تجاوز و حشیانه سی بوکون یدی آیدن زیاده بر مدت
اولیور . بو اوزون مدت ظرفده او اقلیم معلاده ایتالیا وحشیلری بر
طرفدن خرسزلره ، چته لره ، قورسانلره رحمت اوقوته جق ؛ وحشیلره ،
خونخوارلره ، جانوارلره طاش چیقاره جق کیفیات ملعونانه لر ایله
بشکیده کی معصوملرک ، حمل دوشکلرنده کی ضعیف قادینلرک ، وجوددن
دوشمش اختیارلرک ، علیلرک ، شفا خانه لره کی خسته لره کی معصوم
قانلرینی هدر و اراقه ایتمک ، مخدراتک عرضلرینه کچمک ، عبادتخانه لری
خرابه زاره چویرمک کبی ملعتلر ایله اشتغال و افتخار ایدیور . دیگر
طرفدن ممالک محروسه عثمانیه دن زرده آچیق ، غیر مستحکم بر شهر ،
بر معموره کوررسه اورای طویه طوتمق ، بمباردمان ایتمک ،
خسته خانه لری یاقق کبی چیلغیلقلرده ، آلچقلقلرده ، زبونکشلقلرده
بولنیور . اوچنجی بر طرفدن بتون عالم اسلامک دین ، سیاست ،
طبیعت نقطه لرندن استادکاهی ، قبله کاهی ، مراجعتکاهی ، روحی ،
قلبی ، دماغی اولان خلافت عظمی پای تحت مقدسسه کلب عقوره
بکزر وضعیت مختله ایله صالدرمق ، آتیلیمق ، ایضیرمغه یلتمک کبی
مذبوحانه ، مسکینه ، عقورانه چالمر صاتیورسه ده بو چالمرینک ،

او هجوملرینک ، او تجاوزلرینک جزالری عینی زمانده مختلف ،
فجیع صورتلرده کورمکده اولدینی مشهود عیون شکران اولیور .
اوت مغرور ایتالیا بوکون بوتجاوز ، هجوم و تعرض مسکینه نکه
جزالری مختلف ، فجیع صورتلرده چکیور : اول ، طرابلس غربده
یدی آیدن زیاده بر مدتدبری معنا کیر ، صورتاً صغیر ، محترم بر
فته قلیله طرفدن مغلوب ، محصور و هر دقیقه دکزه دوکمه محکوم
اولمق کبی بر وضعیت ایله ایچنده بولنیور . نه عذاب ! ثانیاً : وحشی
بومباردمانلریله هجوم ایلدیکی موقعلرده آجی تبسم ، آجی استهزا
و تحقیرلره هدف اولمده اولدینی کوریورز . نه ذلت ! ثالثاً : تعرضه
یلتدیکی پای تحت مقدس استحکاملرندن هدیهدیلان کله لر ایله حصه
ادبی الیدینی ، موازنه عقلیه و قوای مادیه سنی غائب ایتدیکنی ،
خیبته ، خسران و هزیمته گرفتار ، عالمه قارشو رزیل و رسوای اولدینی
مشاهده ایدیورز . نه مسکنت !

ایتالیان بو حرکات مذبوحانه سنک سبب وعلنی سؤال ایدیلیرسه
طرابلس غربک نه رونلر مالکنه الحاق و اعماری واوراده مدینتک
نشر و تعمیمی اولوب بو خصوصی مال صاحبی اولان حکومت معظمه
عثمانیه و خلافت مقدسه اسلامیه نکه تصدیقه اقتران ایتدیرمک اولدینی
جوانی ویریور . نه حماقت ! حالبوکه بو مسکین و سفیل حکومت
کندی مالکندن بیوک بر قسمک خرابه زار بر حالده اولدینی و یوز
بیکلرجه اهاالیسنک جاهل ، غیر مدنی ، فقیر ، سفیل بر ورطه ده
بولدینی و کندی دنخی ظاهری یالیزیلی ، باطنی قوف ، آج ، ذلیل ،
جین ، مسکین بر حکومت اولدینی کیمسه بیلیمور ظن ایدیور .
بومسکین حکومت بر قاچسنه مقدم حبشستانه قارشو وقوعبولان عینی
حرکت باغیه سیله حبشیلردن ییدیکی دایاغی ، حبشستان چوللرینه
ویردیکی یوز بیکلرجه قربان عسکرینی ، نتیجه ده منهزم ، پریشان ،
مقهور ، مغلوب و بوتون عالم عسکری اوکنده رزیل و رسوای اوله رق
حبشستاندن قاچهرق روماده نفس الیدینی اونوتیورده غنعات عسکریه
وملیه نی یارواغیار دیلرلنده داستان اولان شجاعت و مهابت عسکریه سیله
عالمه شان و یرن ، ناموس و شرف عسکری و ملیسنی بدایت تشککندن
نوکونه قدر محافظه ایدن حکومت معظمه عثمانیه نکه بر ملک مشروعه ،
طرابلس غربنه تجاوزله خرابه زار مسکین مالکنه الحاقی اعلان ایتمک
چیلغلغنده بولنیور .

ایتالیانک بو حرکات عقورانه ، بوتجاوزات غاصبانه ، بو اعلان عهد
شکنانه سنه قارشو رسمی اوروپانک سیرجی ، لاقید بر نظر ایله باقنده
اولدینی اوچیز ملیونی متجاوز بولسان بتون عالم اسلامک مشهود
نظر تلهنی اولمده در . چونکه عالم اسلام یکرمنجی عصر مدینت
حکومتلرینک یکدیگرلرینه قارشو ایفاسنی تعهد ایتدکری حقوق ،
عهد ، مساواته رعایت ایده جکلرینه و بوعهد دولیه یی حرکات
شقاوتکارانه سیله بیرتمق ، صلح و سلم جهانی اخلاک ایتمک آرزوسنده
بولان ایتالیا حکومت شقیه سنی او حرکات باغیه سنندن منع و صلاحه

دعوت ایلہ حدیثی بیلدیرہ جکترینہ مطمئن بولنیورلردی. فقط واسفا که اسلاملرک اوروپایہ قارشى اولان بواطمئنان وحسن ظنلرینک بوشه چیقیدنی وقوعات کوستردی .

چونکه ایتالیانک تجاوزلرینی اوروپانک تقدیس وایقاع ایلدیکی جنایاتی صلیب نامنه تجویز ایتدیکی کورولدی . ایتالیانک بوتجاوز ووحشتلرینه قارشى اوروپانک بوصورتله حرکتی برطاقم اسباب قدیمه وسوائق حاضرهمستند، ایتالیانک تجاوزواقعی ده عینی اسباب وسوائق اولدینی اکلشلدی . اوت ؛ ایتالیا تجاوزینی واوروپانک بوتجاوز مقابله سکوتی تولید ایدن اسباب ، سوائق ومناسبات شونلر ایدی : ۱۸۸۱ ده فرانسه تونس، ۱۸۸۲ ده انکلتره مصری ، ۱۸۸۴ ده ایتالیا اریتره وصومالی اشغال ایتیشلردی. فرانسه، انکلتره، ایتالیا حکومتلری مذکور اقلیملری تحت اشغاللرینه آلدقن صکره ۱۸۹۹ ده دائرة نفوذلرنده اولان اقلیمک حدودینی تعیین وتحدیدده اتفاق ایتیشلردی . ۱۹۰۴ ده مصر وفاس حقنده انکلتره وفرانسه آره سنده ، ۱۹۰۷ ده ایران حقنده انکلتره وروسیه بیننده، ۱۹۱۱ ده صوک اوله رق آلمانیا فرانسه میاننده اتفاقلر وجوده کلشدی. وجوده کلن بواتفاقلرده ایتالیاشمیدیکی احتراصات عقورانه سنک ساحه فعلده تجلیسنی تأمینه موفق اولمش ومعلوم اولدینی وجهله هان بلاتآخر میدان آکشدی .

ایشته آفریقانک وعالم واسلامک مقدراتنه عائد اولان بوآجی حقیقتلردن قطعاً ثابت اولدی که ایتالیانک طرابلس غربیه واقع اولان تجاوزی وعقورانه حرکتلریله رسمی اوروپانک بوبابده اتخاذ ایتمش اولدینی وضعیاتک اسباب وسوائق، مادیات ولدنیااتی بودر. بونکچون رسمی اوروپانک بوکون ایتالیا وحشتلرینه قارشى آله جنی وضعیت سکوت در !!! چونکه رسمی اوروپانک دخی ایتالیا کی یوزی قره، اغزی قانی، آلی کیری، ایتالیا ایلہ اولان مقررات سابقه سنک بخش ایتدیکی اسلام قطعه لری لقمه لریله کوزی دونوک، عقل وفکری مختلدر! الحمد لله ایتالیانک بوکونکی قورصانلغی واوروپانک وضعیتی اسلاملری دالمش اولدقلى درین غفلت اویقوسندن اویاندرمق، رسمی اوروپا ایلہ ایتالیا آره سنده کی روابط، مناسبات ومقرراته خبردار ایتک کی بیوک خدمتله وسیله مبجله اولمشدر . بووسیله مبجله ناک اسلاملره بخش ایلدیکی انتباهدن اسلاملر مقدرات ملیه واجتماعیه لرینه عائد اولان مذکور مقررات دولیه ی اوروپایه کندی ایلہ بیرتدیرمق ویاقدیرمق، ایتالیایی طرابلس غربدن چیقارمق، دکزه دوکمک ایچون مقام معلاى خلافت ومعظم عثمانیلر ایلہ متحد اولمق، برلکده چالیشمق، هر درلو معاونتدن کیرو دورمامق، فدای جان ایتک اوزره عهد وپیمان ایتیشلردر. بوکون ایتالیا محاربه سنه قارشى اسلاملر، عثمانیلرک وخلافت نامنه بتون آفریقا مسلمانلرینک حرکات ومهاجمات متحده خارقه نملری، چین، هند، افغان، ترکستان، بخارا، خیوه، خلاصه بتون کره ارض مسلمانلرینک بالذات وبالفعول مشهود باصره افتخارمن، نظره

پیرای عیون ابتهاجز اولمقده اولان معاونات مادیه وتظاهرات مغویه لری هب او عهد وپیمان اسلامینک آثار قدسیه سندنذر.

ایتالیا عموم اسلاملرک و عثمانیلرک بوتجلیات متحده قهاره لری آلتنده عدالت وانتقام الهی ایلہ عن قریب ازیله جک، وحشتلرینک، قورصانلقلرینک، جنایتلرینک جزاسنی کوره جک، مضمحل وپریشان اوله جق . آوروپا دخی اسلاملرک و عثمانیلرک مقدراتنه عائد اولان مقرراتی اسلاملر و عثمانیلرک اتحادده دوام وثباتلری، علمی ووجدانی وبحق مدنی اولان اوروپانک معاونت انسانیه، مظاهرت عرفانیه، مناصرت مدنیه سیله بیرته جق، احراق ایده جک وعموم اسلاملر ایلہ عثمانیلر و عرفانی آوروپا اکیل ظفری تتوج ایده جک، فضای مدنیت وانسانیتده یوکسلدکجه یوکسله جک، صلح وسلم جهانی محافظه ومدنیت حقیقیه یی نشر، ضعیفلری حمایه وحققرینه حرمت ورعایت ایده جک وایتدیره جکلردر.

ایشته ایتالیانک تجاوزی ورسمی اوروپانک مقرراتی اسلاملرک بویله بیوک املار ایلہ مشبوع ومشحون وبوملی، مشروع وعالی املرینه نائل اولمق ایچون انتباهلرینه و عثمانیلر ایلہ اتحادلرینه وسیله علیا اولمشدر . اسلاملرده وجود بولان بوانتباء وامل معلابی، دین واحتیاجک حصوله کتیردیکی بوتحاد، بووحدت عالییه ی هیچ برقوتک منع ایده میه جکی، اسلاملرک بوانتباءده دوام، خلافت عظمایی حائز اولان عثمانیلر ایلہ اتحادلرنده ثبات، متانت کوستردکجه بتون امللرینه نائل اوله جقلى محقق ایه ده، انقلاب عثمانینک عامل وناظمی اولان عثمانلی مسلمانلرینک بو غایه امل اسلامک دخی رهبر وناظمی اولملری بر فریضه مهمه حیاتیه بیلنمک لازمدر .

بو حقیقتی، یعنی بو غایه امل اسلامی یی جلال نوری بک افدی کندیلرینه مخصوص رنگین ومحتشم بر اسلوب ایلہ حق غرته سنک قرق درت نومرولو نسخه سنده شوصورتله تصویر بیوردیلر : «عجبا عصر لرحه دوام ایدن بردور! انحطاطدن، برحال مشوشیتدن چیقان وبوکون حریتله برابر شرف وناموسنی ده استرداد ایدن دولت عثمانیه نك، ملت عثمانیه نك، عالم اسلامک، تورک لک نایه ونخبه املی، ایده آلی، هدفی، مقصدی نه در؟

بوسؤاله جواب ویرمک کوچ دکلدردر . بز ایده آلیمز بیلیرز . کزیده آل عثمان سلطان محمد خان حضرتلرینک تحت حکمرانی سنده بولان بودولتک، اوتوز ملیونلق عالم عثمانینک، اوچوز اللی ملیونلق عالم اسلامک، اللی ملیونلق تورک عالمک غایه املی بر در : عظمت سابقه یی اعاده وهیئت دولیه آره سنده حیثیت، مدنیت، قوت اعتباریله حق مسامراغزی استحصال واستعمال! اوت؛ بوغایه یی قبول ایتیه جک کیمسه یوقدر . داهای دوغریسی عثمانلی، تورک اسلام اولمق بوغایه ایلہ پرورشیا ب اولمق دیمکدر ...

هیئت عثمانیه اسلامییه عشق ایلہ، قلب وروح ایلہ، بتون موانعه اقتحام ایلہ بویله جه غایه امله دوغری کیدرسه - امین اولیکز - آنی

راه عزمنده نه موازنه عمومی سیاسیة نك طوپلری ، زرهیلری ، نه ده
آوروپانك سونیتی چویره بیلیر . بو ایده آل ایله ، بومقدس ومشروع امل
ایله ملت عثمانیه نك نجات جلیه سی ، خواص فطریه سی داهازیده تجلی
آیدر . دوست دشمن قارشولرنده نه متحد ، نه مترقی ، بر قوت اولدیغنی
اگلارلر . بعضاً مادی قوتك ، طوپك ، تفنكك یایه میه جغنی عزم وثبات
یایار . بزده ، ماده اولان نقصانلری میز ا کمال ایدنجه یه قدر بومغوی
قوتك انکشافه چالیشمه لی یز . خصوصیه بو کچیردی کمز زمان ، هنگامه
حرب بوحسك الك زیاده توسع ایده جکی بردوره امتحانیه در . بو غایه
هر عثمانلینك مایه سنده مند مجدر . آنی انکشاف ایتدیرمك ایسه ،
خصوصیه شو دقیقه ده اک برنجی وظیفه ، اک مقدس بر حقدور . »
بوحقایقك لازمکنلر طرفندن نظر دقته آله جغه امیدمز برکالدر .

اندرون هایون معلمی

قولجه لی عبدالعزیز

سیاست

عالم اسلام

انکلتزه - آلمانیا

آلمانیا نك در سعادت سفیری بارون مارشالك آلمانیا حكومتی طرفندن
جلب ایدیلر ك لوندره سفارته تعیین ایدلمه سنی بتون مطبوعات اجنبیه
ومحافل سیاسی طرابلس غرب محاربه سی ایله علاقه دار عد ایدیور .
مشارالیه سفیر جنابلری الیوم قارلسروه ده آلمانیا ایمپراطوری ،
آلمانیا باش وکیلی خارجییه ناظری ایله مذاکره ومداوله افکار
ایده رك لوندرده تعقیب ایده جکی مسلك حقنده تعلیمات آلقده در .
شو تعلیماتك اساسی ، آلمانیا ایله انکلتزه آراسنده بر زمین ائتلاف
واشتراك مساعی تهیه سندن عبارت اولدیغنی هر کس تخمین ایدیور .
بتون حیات ملل اوزرینه اجرای تأثیر ایده بیله جك بویه بر مهم تشبث
ایچون آلمانیا ایشته اك مقتدر واك ذکی عد ایدیلن دیپلوماتی مأمور
ایدیور .

شو تشبثك درجه اهمیتنی تقدیر ایچون شوراسنی سویله یه لم كه
بوكون حیات بین الملله مشاهده ایدیلن بتون تزلزلات وترددات
وصلح ومسالت عمومییه دائمی بر تهلكه آلتنده بولندیران باشلیجه
اسبابك منشأی ، آلمانیا ایله انکلتزه آردسنده کی رقابت در .

شمیدیکی آلمانیا آوروپا حكومتلری آراسنده الك صوك تشكك ایتمش
اولان بردولتدر . شو حكومت تشكك ایتدیکی زمان استملاك ایدیله بیله جك
بتون خالی قطعه لر ویا خود کفایتسز ، درایتسز صاحب لری طرفندن
اداره ومحافظه ایدیله مین بتون یرلر ، ده اول تشكك ایتمش اولان
دیگر دولتلر طرفندن ضبط وغصب ایدیلشدی . حالبوكه بر طرفندن

آلمانیا اهالیسنك نفوسی ، دیگر طرفندن آلمانیا تجارت وصناعتی دهشتلی
بر صورتده تزییدوترقی ایتمكده ایدی . اهالینك آلمانیا ده بارینه میان فضله سی
بر زمانلر آمریقایه طوغرو هجرت ایدیوردی . فقط بالاخره امریقا کندی
قاپولرینی آلمانیا مهاجرلرینه قاپادی . ایشته بونك ایچوندر كه آلمانیا
حكومتی كرك تبعه سنك فضله سنی اسكان ایتدیرمك ، كرك محصولات تجاریه
وصناعیه سنه مخرجلر ، بازارلر بولمق ایچون نه اولورسه اولسون
مستملكات الله ایتیه چالشمغه باشلادی . قارشوسنده هنوز استیلا
ایدلمه مش ، لكن ضعیف ، متزلزل ، همان همان پریشان اولمق اوزره
بولان برقاق حكومات اسلامی بولنیوردی . ایشته آلمانیا حكومتی
ایچون اك صاعلام ، اك قیصه طریق شو حكوماته طوغرو یورومك
ایدی . فقط بوراده مشارالیه قارشو ینه عینی عالم اسلامك بر چوق
نقاطنه مالك ومتبایسنده چوقدن بری كوز دیکمش اولان دیگر
حكومات چیقیوردی . بولردن اك باشلیجه سی انکلتزه ایدی . باطبع
ایجابات ومقتضیات حیاتیه ایله يك دیگرینه قارشو كلكده اولان شو
ایکی حكومت آراسنده برکون مصادمه وقوع بوله جغنی محقق در .

انکلتزه نك بتون قوتی دکر اوزرنده در . بتون مستملكاتی قوه
بحریه سی ایله محافظه ومدافعه ایدیور . کنیدیسی ایسه مدهش بردونما
طرفندن مدافعه ایدیلن برقاق اطه لرك اجتماعندن متشکل بردولت اولدیغنی
ایچون باشقه لری طرفندن غیر قابل هجوم واستیلادر . بویه بردولته قارشو
حیقاراق آنكه رقابت ایتك ایچون آلمانیا یه بالخاصه دونماسنی تقویه ایتك
لازم ایدی . فی الحقیقه آلمانیا دونماسنك تقویه سنه بتون قوت ودقی ایله
قویولدی ، بر چوق فداكارلقلر سایه سنده آز زمان ایچنده قوه
بحریه سنی انکلتزه دونماسندن صوكره اك یوكسك بر موقعه ترفیع
ایتدیوردی . ایشته بومناسبتله آلمانیا ایله انکلتزه آراسنده تزیید قوای
بحریه اوزرینه بر مسابقه ورقابت آچیلدی . آلمانیا نك هر یکی زرهلیسنه
دره نوطنه مقابله انکلتزه ایکسینی انشا ایتدیوردی .

عینی زمانده آلمانیا انکلتزه نك عالم اسلامده کی نام وشانتی تنزیل
ایتدیردر ك آنك یرینی کنیدیسی طوتمق ایچون مسلمانلری اوقشامق ،
آنلره دوست کوردونمك طریقنی التزام ایتدی . عبدالحمید زماننده
مقام خلافته تقرب ایدر ك آلمانیا ایمپراطوری استانبوله قدر
اجرای سیاحت ایتدی . شو سیاحت اثناسنده یاپیلان دارات
واحتشامات ، ابا ایوب انصارینك مقبره سی اوزرنده ایراد ایدیلن
حساس ومطمنطن نطقلر آلمانیا دولتنك عالم اسلامده انکلتزه نك
یرینی طوتمق ایسته دیکی نیتی تمامیه تظاهرایتدی . فی الحقیقه حكومت
مشارالیه بوکی ده دیگر بعض حرکات وافعال ماهرانه سایه سنده عالم
اسلامده آزر زمان ایچنده بومقام بلندی اخذایتدی . آلمانیا مسلمانلرجه
اك صمیمی ، اك حقیقی دوست عد ایدلمه یه باشلاندی .

لكن آلمانیا نك شو صوك ایکی سنه ظرفنده ابراز ایتمش اولدیغنی
بعض حرکات مسلمانلر ك کنیدیسی حقنده بسله مکده اولدیقلری
[افکار و حسیاته توافق ایتده دی . مثلاً ایران حقنده روسیه ایله اوزلاشهرق